

:: DÍA MUNDIAL

A presión industrial e urbanística condena os humidais á desaparición, como evidencia a destrución eólica das turbeiras do Xistral. **Biólogos e ecoloxistas responsabilizan a Xunta pola ausencia dunha política de xestión. Borregón prevé incluír 200 destes espazos na Rede Natura**

# Galicia perde o seu patrimonio húmido

REBECA FERNÁNDEZ

Recheos, piscifactorías, campos de golf, parques eólicos, polígonos industriais, encoros, infraestruturas de comunicación... As continuas agresións que sofre o noso medio natural convértese nunha auténtica ameaza para os máis de 1.000 humidais incluídos no inventario galego, levándoos ó bordo da desaparición. Unha situación que só se explica pola ausencia total de políticas de xestión e conservación por parte da Xunta. Así o cren **biólogos e ecoloxistas**, que unen as súas voces para alertar no Día Mundial dos Humidais que se celebra hoxe da febleza duns ecosistemas tan descoñecidos como vitais para a conservación da biodiversidade, a regulación hídrica e a loita contra o cambio climático, ó funcionar como reservorios naturais de carbono.

Galicia é o territorio do Estado con maior diversidade de lagoas, bañas, xunqueiras, bosques hú-

## Son reservorios de carbono e inflúen na regulación hídrica

midos e turbeiras, ocupando unhas 7.678 hectáreas da nosa xeografía. A pesar desta diversidade só cinco gozan de protección legal: o Complexo Húmido de Corrubedo, o Complexo Intermareal Uma-O Grove, a lagoa de Valdoviño, a Ría de Ortigueira e a de Ribadeo, o que sirva á nosa comunidade á cola en canto a políticas de conservación destes espazos. Unha blindaxe que, para Asociación para a Defensa Ecolóxica de Galicia (Adega), se volve moi feble no día a día, como demostra o baleirado sufrido na lagoa da Frouxeira (Valdoviño) ou os danos causados pola construción dunha praia artificial e un porto na ría de Ortigueira. Ademais, instrumentos vitais para a súa protección como o Plan do Litoral (POL) non constitúen para Adega ningunha seguridade, ó deixar "vía libre" á instalación de industrias, co seu conseguinte impacto nos ecosistemas.


"A Xunta é a principal responsable da degradación destes espazos", esgrime Fins Eirexas, secretario executivo de Adega. Un diagnóstico que comparte Emilio Rodríguez, secretario do Colexio Oficial de Biólogos de Galicia: "Contamos cun rico patrimonio húmido pero existe un importante déficit de xestión, principal causante da súa degradación". Para Rodríguez, o papel da Administración galega na conservación destes ecosistemas está a ser nula, favorecendo non só a súa deterioración, senón que sobrevivan illados e sen conexión entre si, levándoos

### RADIOGRAFÍA

## Humidais

Lugares da lista Ramsar situados en Galicia

Humidais inventariados por provincia, en %



### Humidais galegos na lista Ramsar

#### Ría Ribadeo.

Ano de ingreso: 4 de outubro de 1994

Tipos de humidais:

- Estuarios
- Baixos intermareais de lodo, area ou con solos salinos
- Pantanos e esteiros
- Augas mariñas e superficiais permanentes
- Costas mariñas rochosas
- praias de area ou de seixos

#### Rías de Ortigueira e Ladrido.

Ano de ingreso: 8 de maio de 1999.

Tipos de humidais:

- Baixos intermareais de lodo, area ou con solos salinos

#### Estuarios

- Augas mariñas superficiais permanentes
- Praias de area ou de seixos
- Costas mariñas rochosas

#### Valdoviño

Ano de ingreso: 26 de marzo de 1993

Tipos de humidais:

- Lagoas costeiras salobres/salgadas
- Praias de area ou de seixos
- Pantanos e esteiros
- Humidais boscosos de auga doce
- Ríos/arros permanentes

#### Corrubedo.

Ano de ingreso: 20 de marzo de 1993

Tipos de humidais:

#### Augas mariñas superficiais permanentes

- Pantanos e esteiros
- Lagoas costeiras de auga doce
- Ríos/arros permanentes
- Pantanos/esteiros/charcas permanentes de auga doce

#### Uma-Grove

Ano de ingreso: 5 de decembro de 1989

Tipos de humidais:

- Baixos intermareais de lodo, area ou con solos salinos
- Augas mariñas superficiais permanentes
- Estuarios
- Lagoas costeiras de auga doce

#### Tipos en orde de predominancia no ecosistema.

XF • GALICIA HOXE

Fonte: Inventario dos humidais de Galicia

## AXENDA ■ Medio Rural desprázase ata Corrubedo en compañía de escolares e ata Rábade para resolver o concurso de fotos e debuxo sobre estes hábitats

# Corenta voluntarios de Adega 'móllanse' nas lagoas de Xuño

Hai hoxe corenta anos, na cidade iraniana de Ramsar asinouse o Convenio de Humidais de Importancia Internacional, no que se marcaron os obxectivos para a conservación e a xestión destes ecosistemas. Para conmemorar esta data, a Función Biodiversidade e o Centro Español de Humidais (Cehum) —dependentes do Ministerio de Medio Ambiente— celebrarán cinco actuacións simultáneas para revertir a degradación destes ecosistemas no marco dunha acción denominada 'Móllate polos humidais'. Galicia é unha das zonas escollidas grazas a un proxecto que desenvolverá a asociación ecoloxista Adega, no marco do seu popular Proxecto Ríos. Un total de corenta voluntarios, organizados en catro grupos, desprazáranse ata as lagoas de Xuño e Mu-

teiro para detectar manchas illadas de especies foráneas, sobre as que actuarán ó longo de hoxe. Mais os ecoloxistas non serán os únicos que celebren o Día Mundial dos Humidais. Medio Rural desenvolverá dous actos paralelos en dous espazos senlleiros: as lagoas de Carregal e Vixán do parque natural de Corrubedo e as de Rábade, en Lugo. No humidal costeiro, a directora do parque, África Núñez, explicará a importancia destes ecosistemas ós escolares que participarán na visita organizada pola Xunta. Mentres, o director xeral de Conservación da Natureza, Ricardo García Borregón, desprazárase ata Rábade, onde concederá os premios de foto e debuxo convocada pola Administración autonómica con motivo do Día Mundial dos Humidais.

## Seminario do Ceida en Oleiros

O Ceida tamén conmemora a data coa celebración en Oleiros unhas xornadas para dar a coñecer os valores ecolóxicos dos humidais, así como o seu potencial e materia de educación ambiental.

á perda irremediable da biodiversidade que albergan. Para Adega, a xestión inadecuada destes ecosistemas provocou en moitos casos o sangrado, entullado, desecamento e destrución dun bo número de humidais galegos, como evidencia as desaparecidas lagoas de Pantín (Valdoviño) e Corme, a degradación das turbeiras do Xistral como consecuencia da acción dos eólicos ou a situación crítica que viven as

## Os costeiros, os máis ameazados, minguaron un 60% a nivel estatal

Gándaras de Budiño. Os costeiros son, de todos os humidais existentes, os que corren máis perigo debido, entre outras cousas, á maior presión que sofren. A ocupación poboacional —co 70 por cento da poboación vivindo na franxa atlántica— hai que sumarlle o crecente interese privado polos terreos litorais, cunha multiplicación nos últimos anos de industrias, infraestruturas e inmobles. "A contaminación e o urbanismo, cunha apetencia desmedida por edificar na costa, son os principais causantes da súa degradación", apuntan dende o Colexio de Biólogos. Unha situación que coloca a Galicia na senda do Estado, onde xa desapareceron o 60 por cento dos humidais costeiros. Fronte a esta situación, as receitas de ecoloxistas e biólogos son coincidentes: aumento da lista de humidais protexidos, cumprimento estrito da xestión ambiental, ordenación do territorio e restauración dos ecosistemas danados, tal e como establecía o Plan de Recuperación dos Humidais anunciado en 2004 e do que nada se sabe.

Consistente da relevancia dos humidais, a dirección xeral de Conservación da Natureza da consellería

## O 80% da superficie inventariada gozará de maior protección

de Medio Rural prevé paliar a falta de protección coa inclusión de ata 200 humidais na Rede Natura. "Coa proposta de ampliación na que se traballa, engadiranse 11.300 hectáreas ás 45.270 xa incluídas en Natura 2000, co que se alcanzará o 80% da superficie de humidais inventariados", informan fontes de Medio Rural, que ven no futuro Plan Director da Rede Natura de Galicia un importante instrumento de planificación e xestión dunha boa parte dos humidais do país. Ademais, o departamento dirixido por Ricardo García Borregón está revisando e actualizando o Inventario dos Humidais, que se verá ampliado, así como o estatal. ●